



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

KOMUNIKADU IMPRENSA

Períodu : Juñu 2011

Edisaun : 28 Juñu 2011

JSMP kontinua hala'ó treinamentu kuadru legál aktual Timór Léste nian ba PNTL iha Distritu Covalima

Iha loron 23 fulan Jullu 2011 Judicial System Monitoring Program (JSMP) liu husi Unidade Pesquisadór Legál no Unidade Relasaun Públiku (Outreach) halo treinamentu konabá Kódigu Penál (KP) ba membrus PNTL Distritu Suai-Covalima iha eskuadra PNTL Suai. Treinamentu ne'e partisipa husi membrus PNTL hamutuk na'in 26. Membru hirak ne'e partensia ba Unidade Investigasaun, Unidade Trânzitu, Unidade Polísia Komunitária, Unidade Apoiu Dezemvolvimentu Profísional ka *Professional Support Development Office (PSDO)*, *Task Force* no seluk tan.

Diretór ezekutivu JSMP, Luis de Oliveira Sampaio hateten katak, treinamentu ne'e ho objetivu atu kontinua hametin kapasidade legál no justisa ba sosiedade inklui autoridades Polísial sira iha nivel distrital hot-hotu atu koñese diak liu ita nia enkuadramentu juridika kriminál nian, liu-liu provizaun relevantes sira ne'ebé iha relasaun ho papel polísia nian.

JSMP konsiente katak polisia mak sai hanesan autór prinsipál iha nivel sosiedade, tanbá ne'e JSMP hanoin katak importante tebes atu apoiu no fasilita polísia sira nia kapasidade no koñesimentu iha área relevantes atu kaer sira nia papel ho profesional no kumpriende sira nia obligasaun tuir lei haruka.

JSMP observa katak durante treinamentu ne'e partisipantes sira ativu tebes hodi fahe sira nia esperensia iha terenu, no fó sira nia opiniaun ka observasaun bázeia ba sira nia esperensia prátika lor-loron nian. Aliende ne'e iha treinamentu refere partisipante sira mós hato'ó preokupasaun konabá funsionamentu sistema justisa no implementasaun lei iha kontestu vida aktual nasaun nia ohin loron. Liu-tan sira manifesta mós sira nia interese atu hatene diak liu tan rezultadu observasaun JSMP nian relaciona ho progresu ne'ebé ita nia setór justisa atinze ona inklui dezafiu ne'ebé setór ne'e infrenta.

Ba oportunidade ne'e, Komandante PNTL Distritu Covalima, Sr. António Mau Luta haktuir katak, *PNTL Distritu Covalima sei preziza nafatin aprende no estuda lei tantu husi treinamentu ka aprende husi meus sira seluk atu iha kuñesimentu diak liu konabá lei tanbá Polísia mak*

nu'udar implementadór lei no ordem hodi asegura no proteje direítu sidadaun iha paìs direítu demokratiku ida ne'e.

Nia mós subliña katak maski *entre membru sira ne'ebé mak partisipa iha treinamentu ne'e balun tuir ona treinamentu legál dala rua ka tolu, maibé la taka dalan atu aprende no aprende nafatin hodi aumenta kuñesimentu lei diak liu tan.*

Atu sukat kapasidade membru sira nian, Señor Komandante ne'e mós uza aikanoik ida atu halo komparasaun katak, *“maske Polísia iha katana maibé kuandu la kadi beibeik mak katana ne'e sei la kro'at no la bele tá kotu buat ida”.*

Ikus liu Komandante PNTL iha ninia intervensaun hodi enserra treinamentu ne'e husu ba JSMP atu kontinua halo treinamentu konabá direítu penál ba sira nia membru iha Suai-Covalima tanbá kuadru penál hirak ne'e nu'udár instrumentu prinsipál tebes ba sira atu sira bele iha kuñesimentu ne'ebé kle'an liu tan hodi implementa iha sira nia knaar ka servisu atu servi ba povu no nasaun ida ne'e.

Treinamentu ne'e rasik realiza tanbá hetan apoiu finanseiru husi *Justice Support Facility* nu'udár koperasaun bilateral entre Governu Australia no Governu Timór Lésté.

Atu hetan informasaun ne'ebé klean liu favor kontaktu:

Luis de Oliveira Sampaio

Diretòr Ezekutivu JSMP

Diresaun E-mail: luis@jsmp.minihub.org

Landline: 3323883/7295795